



EDITORIAL

Pinakahitaas nga Pula nga pagsaludar para ha mga martir han Dolores!

Ginpapaabot han katawhan ngan han mga rebolusyunaryo nga pwersa ha Eastern Visayas an pinakahitaas nga Pula nga saludo ha 19 nga Pula nga mangaraway nga namaritr ha pasista nga todo-atake han Armed Forces of the Philippines hadton Agosto 16 ha Brgy. Osmeña, Dolores, Eastern Samar.

Kaupod hira ha pinakamag-upay nga anak han katawhan nga naghalad han ira kinabuhi ha pagserbe ha katawhan ngan nakigbisog para ha nasyunal nga katalwasan ngan demokrasya. Mabug-at ha kasingkasing han masa an ira pagkamatay. Naduyog ha kasubo an anakbalhas ha bugos nga nasud ngan tiniyupi nga katawhan ha bug-os nga kalibutan.

An mga martir han Dolores kaparte han 50-katawo nga yunit han BHB nga naghihimo han buruhaton masa. Ginpanalipdan nira an mga nakab-ot na nga kadaugan ha mga kontrapudal nga pakig-away ha nag-

labay. Gin-atuhan nira an mga armado nga kriminal ngan sindikato han ilegal nga druga nga gin-aataman han mga pulis ngan militar. Nagin kabakyang hira han masa ha pag-atubang ha problema ha baha ngan panmeste ha umhanan. Naghatag hira hin serbisyo medikal ngan binulig ha produksyon han mga parag-uma nga maiha na ginpasibay-an han reaksyunaryo nga estado.

Tungod hini, mapaso nga ginhangkop ngan ginsuportahan han masa ha Dolores an yunit han BHB. Tungod ha grabe nga krisis ha ekonomiya, pulitika ngan kalibsugan,

"Pinakahitaas nga Pula..." sundan ha paypay 2

Armado nga pakig-away ha EV, nagpapadayon

PADAYON AN MGA yunit han Bagong Hukbong Bayan (BHB) ha Eastern Visayas ha pagpasulong han armado nga pakig-away ngan ha paningkamot nga pakyason an todo-gerra han panmuyop han mga pasista nga alipures han rehimen US-Duterte.

Duha nga elemento han Civilian Armed Forces Geographical Unit (CAF-GU) an napatay ha taktikal nga opensiba han BHB-Rodante Urtal Command (BHB-RUC) ha Brgy. Happy Valley, San Isidro, Northern Samar hadton Agosto 21. Aktibo hira nga nageserbe komo giya ha mga operasyon han militar. Hini nga adlaw, usa liwat nga sundalo han 43rd Infantry Battalion an napatay ha agway han BHB-RUC ngan militar ha Brgy. Palanit hini gihap nga bungto.

Usa nga pulis an patay ha agway han BHB-RUC ngan PNP-Regional Mobile Force Battalion ha Brgy. Geparayan, Silvino Lobos, Northern Samar hadton Agosto 19. Ha inisyal nga report, nagpapatruyla an mga pulis han pabuthan hira han mga Pula nga mangaraway.

Patay liwat an usa nga sundalo ngan samaran an usa pa ha operasyon nga haras han usa katim han BHB-Arnulfo Ortiz Command (BHB-AOC) kontra ha pito nga tropa han 63rd IB ha Sityo Burabod, Brgy. Mabini, Basey, Western Samar hadton Agosto 7 dapit alas-5 han aga. Naghihimo an 63rd IB hin operasyon nga RCSP ha Burabod bisan kun hadton 2020, gindeklara na han militar nga "malimpyo" na ha BHB an nasering nga bungto. ■



Kabatan-unan, diri nahuhubas nga atabay han rebolusyon

Sukwahi ha buwa nga pakaraot han pasista nga estado, naglalarab an pag-ato han kabatan-unan ha kabaryuhan.

Dara an mga duma ngan inandam nga pankultural nga pasundayag, mayrayhak nga nagsarusaruay an mga kabatan-unan ngan Hukbo hin mga tala-kayan, kanta, ngan sayaw ha ginlansar nga kumperensya han Kabataang Makabayan (KM) hadin naglabay nga Agosto 21 kun diin masobra 50 nga kabatan-unan tikang ha usa nga baryo an nanumpa komo kaapi han KM.

Ha tema nga “Kabatan-unan, magpartisipar ha kagiusan masa ha kabaryuhan! Umapi ha Bagong Hukbong Bayan! Atuhan an pamamasismo han militar ha kabaryuhan!” luman-daw an dirudilain nga isyu han masa ha rehiyon, labina an isyu han mga kabatan-unan nga parag-uma, an ungara han mga kabatan-unan ha talwas nga balik-eskoyla, ngan an kriminal nga kapasibay-an ngan pasista nga atake han rehimen Duterte ha ira ranggo.

Waray kabuwason

“Waray nakikit-an nga kabuwason an kabatan-unan ilarum han rehimen Duterte,” pahayag ni Ka Mori, naeleher nga tagapangulo han tsapter han KM ha baryo, ha iya pamulong.

Duha kasemana nala antes an

pag-abre han klase, 8.5 kamilyon pala an nakag-enrol ha elementarya ngan hayskul ha bug-os nga nasud tanding ha 27.77 kamilyon nga nag-enrol antes han pandemya. Aada naman ha 2.73 kamilyon an umundang pag-eskoyla han naglabay nga akademiko nga tuig dara han palpak nga *modular learning* han Department of Education.

Hiluagan an kawaray trabaho ha kabatan-unan nga nakomponer ha mayoriya han pwersa ha produksyon han nasud. Ha ihap han Kilusang Mayo Uno, aada ha 9.2 kamilyon tubtub 13.5 kamilyon nga indibidwal an waray o kulang hin trabaho ha panahon han pandemya.

Nag-aaraba hin kagutom an kabatan-unan ha kabaryuhan. Diri haru-mamay an pagluross han presyo han lukad ngan iba nga produkto ha Eastern Visayas samtang ura-ura an paghitaas han presyo han papliton.

Yawe nga papel

Sering ni Ka Rebo, pampulitika nga instruktur (PI) han yunit nga nagdumara han kumperensya, nagin sentro nga diskusyon han katitirok an makasaysayan nga papel han kaba-

tan-unan ha pagpasulong han rebolusyon ngan an ira yawe nga tahas nga atuhan an militarisasyon ha kabaryuhan.

Waray kamurayawan an kabatan-unan ha wala-tuo nga panmomba, paturapak nga panganyon, waray wantas nga panmatay, pangaresto, ngan pwersahay nga pagpasurrender ha ira mga komunidad ha tahub han Retailed Community Support Program (RCSP).

Sanglit nanawagan naman hi Ka Mori nga kumatin na hin armas ngan umapi ha Bagong Hukbong Bayan agud desisibo nga pakyason an mga pasista nga larang ha kabaryuhan ngan bag-uhon an dunot nga sistema.

“Gin-aayat kita nga suportahan an hukbo han katawhan ha dirudilain nga pamaagi. Pinakamaupay hini an magpagawas hin mga bag-o nga pultaym nga maapi ha Bagong Hukbong Bayan.”

Ha atubangan han madarahug nga larang han panmuypoy han pasista nga rehimen, tinagdamo an nalutaw nga mga bag-o nga dugo nga mahasog ha dalan han rebolusyon. An kabatan-unan an diri nahuhubas nga atabay han kagiusan nga makatin hin armas agud ipadayon an gerra han katawhan tubtub ha kadaugan. **■**

“Pinakahitaas nga Pula...,” tikang ha paypay 1

naglalarab an ira tinguha para ha rebolusyunaryo nga pagbabag-o. Damo ha ira, labina an mga kabatan-unan, an umapi ha hukbo han katawhan. Hira an mga tagserbe han katawhan nga waray kaluoy nga ginlasurbo han bug-os nga kusog han pasista nga rehimen.

Kaangayan la nga maglansar an ngatanan nga yunit han BHB ngan rebolusyunaryo nga organisasyon masa

hin mga programa han pagparangal ha mga mabayanion nga martir han Dolores. Maghalad kita hin mga kanta, sayaw, luwa ngan iba pa nga pankultural nga pasundayag. Hinumdomon naton hira komo aton mga mabayanion nga mangaraway, giya, kaupod, magturutdo, doktor, suok nga sangkay ngan kabakyang ha kasubo ngan kalipay.

Ha pag-atubang naton ha ginpagrabe nga pasista nga pangatake han

kaaway, himuon naton nga inspirasyon an mga martir han Dolores, sugad liwat an ngatanan nga martir nga naghalad han ira kinabuhi para ha katalwasan han katawhan. Pasidunggan naton hira pinaagi han pagpursige nga tapuson an pasista nga paghahadi han rehimen Duterte ngan pagpasulong han gerra han katawhan. Ha dayuday, an aningal han mga bomba han kaaway mauungbawan han kusog han pag-ato han katawhan. **■**